


Vg
4346





QK. 213 22.




Bedencken auff

INTERIM

Des Ehrwürdigen vnd
Hochgelarten Herrn

PHILIPPI MELANTHONIS.

1548.



K. 213.



Handwritten text, likely bleed-through from the reverse side of the page. The text is faint and difficult to decipher but appears to be organized into several lines.





Vs ist die Vorrede die
newlich für das buch gemacht
ist nicht zugestalt/darumb ytz
undt wir dauon kein meldung
thun können / Wir vernemen
aber/das es eine sehr beschwer
liche schrift sey / wo nuhn diese meynung
darinn ist/das sie vnseren Kirchen verdammen/
vnd das die annemung dieses Buchs ein be
kenntnis sey / Als haben vnseren Kirchen bis an
her vnrecht gelert / Vnd haben mutwillige spat
tungen angericht / So ist aller vorstendigen in
vnsern Kirchen notturfft / dieses zuantworten
/ Denn so wir vns nach erkantter warheit
des Euangelij / selbst also straffen / vnd vns zu
verfolgung der selbigen erkantten warheit ver
pflichten würden / Dieses were Gottes lestes
rung die nicht vergeben würde/dauer vns Got
gnedigklich behütten wolle.

Wiewol nuhn kriegk vnd zerstörung ge
drewet werden / So sollen wir dennoch Got
tes Gebot höher achten / Nemlich das wir er
kante warheit des Euangelij nicht verleug
nen sollen.

Zum Andern so ist auch die lehr vom Son
Gottes / vnd vergebung der sünden / Ein beson
der Radt Gottes / Den Gott auß vnaußpre
chlicher barmhertzigkeit geoffenbart hat / vnd
wil das alle Menschen die selbige lehr erhalten

A ij helfen /

helffen / dardurch inn recht anzuruffen vnd seligkeit zuerlangen.

Nuhn hat der Teuffel von Adams zeiten an / für vnd für viel list versucht / diese lehr außzuleschen / oder zuuerdunckeln / wie die Exempel schrecklich beweisen.

Darumb sollen wir vns vleysig hütten / das wir nicht von rechter lehr abgefuret werden / wie vns Gott offft sehr warnet vnd vermanet.

Zum dritten so wol man auch bedenccken / So man in Kirchen dieser landt offentlichen / vnrechte lehr vnd Abgötterey widerumb anrichten würde / wie gross ergernis in vnsern Kirchen verursacht würde / Denn viel Gottfürchtige leut würden in grosse betrübnis fallen / vnd wurde rechte anruffung Gottes verhindert.

Aus diesen hochwichtigen vrsachen / wol man sich in dieser sache wol fursehen / was man schliessen wolle.

Wir streiten nicht aus eygnem freuel / furwitz oder stoltz / wie vns von etlichen auffgelegt wirdt / Gott der aller Menschen hertzen kendet / der weis das wir hertzlich gern frieden sehen vnd selbst haben wolten.

Vns dringet aber zur bekentnis der rechten lehr / die in vnsern Kirchen gepredigt wirdt /
dieses

dieses ernstlich gebot / das man erkante leer
der warheit des Euangelij nicht verleugnen
vnd nicht verfolgen solle/wollen auch vnser ge
ferlichkeit Gott befehlen.

Vnd nach dem man nuhn ihm wercke bes
findet / das die Bischoff vnd jr anhangt keine
vergleichung annemen wollen / vnd die vnei
nigkeit inn der leer / vnd etlichen Ceremonien,
gleich wol bleiben wirdt / vnd sie vns keinen
Priester ordinieren wollen / were besser das wir
doch vnsern Kirchen ruhe vnd fried liessen/vnd
nicht selbst vnter vns mit newen verendrun
gen / vnrhue / vneinigheit vnd ergernis an
richten.

Denn dieses Buch wirdt doch in vielen lan
den vnd Stedten gewisslich nicht angenommen
werden.

Dieweil aber die stück vnd Artickel im buch
vngleich findt/Ettliche findt recht/ettliche vn
recht / Ettliche reden von haubt Artickeln des
glaubens die alle Menschen wissen vnd verste
hen sollen/Ettliche aber von andern saehen die
nicht so nötigk sindt.

Wollen wir ordentlich vnser vnterthenig
bedencken anzeygen / vnd was recht ist / das
wollen wir nicht Calumniose vnd Sophistice, an
fechten/Sondern klar vnd einfeltig bekennen/
dagegen was vnrecht ist / das sollen wir nicht
billichen.

A ij Der

Der anfang des Buchs von des mensch-
en schöpfung vnd fahl/von der Erbsündt vnd
erlösung durch Christum ist recht vnd vnstreff-
lich/hernach aber am vierden blat/vnter dem
titel von der rechtfertigung ist dieser mangel/
Das das Buch klar setzet/die lieb sey die gerech-
tigkeit/vnd wirdt diese meynung in den volgen-
den bletteren erholet/vñ also erkleret/ Das man
gewisslich daraus verstehen kan / Das das
Buch nicht eintrechtig ist / mit der warhafftigen
lehr / die durch Gottes gnad ihu vnsern
Kirchen gepredigt wirdt/ Wie der Mensch für
Gott vmb des Herrn Christi willen gerecht vñ
angenehm sey durch den glauben.

Vnd wiewol das Buch spricht/durch den
glauben kom der Mensch zu der gerechtigkeit/
So ist doch dieses des Buchs verstandt/
Der glaub sey nuhr ein vorbereitung/vnd dar-
nach sey der Mensch gerecht durch die lieb
wie das Buch offentlich sagt/Darnach sey der
Mensch warhafftiglich gerecht / durch die
liebe.

Vnd damit es sich weiter erkleret / spricht
es/es sey gleichwol warer glaub im Menschen/
wenn er gleich in bößem gewissen lebet / vñnd
die liebe nicht hat.

Item von wegen der lieb sey der Mensch
ein erb des ewigen lebens.

Das

Das alles ist im grundt die meynung der
Mensch ist gerecht/das ist / Gottgefellig / von
wegen seiner lieb vnnnd werck / wie vor dieser
zeit die Mönch geleret haben.

Vnd wirdt in diesem Artickel/die nöttige
lehr vom glauben verschwiegen/nemlich das/
ob gleich lieb vnd gut gewissen in vns sein solt
vnd muss / sindt wir doch vor Gott gerecht/
das ist / Gott gefellig / vmb des Heylands
Christi willen / durch das vertrauen auff ihn/
vnd nicht von wegen vnser reynigkeit.

Dieser Artickel ist durch Gottes gnaden al
so erkleret in vnsern Kirchen/das wir nicht
zweiffeln/Es sindt sehr viel Menschen/die ihn
wol vnd recht verstehen / vnnnd Können dieses
Buch wol richten.

Wir bekennen vnd lehren auch trewlich/
Das rew vnd leydt / bekerung zu Gott / lieb /
guter vorsatz / vnnnd gutt gewissen im hertzen
sein müssen/vñ mus dieser spruch war bleyben.

Qui non diligit, manet in morte.

Es müssen beysamen sein/viel nöttiger tu
gende / Glaub / lieb / hoffnung / gut gewissen/
gutter vorsatz etc. Wie solchs durch Gottes
gnaden reichlich in vnsern Kirchen gepredigt
wirdt.

Darnach yber diese tugende / muss das
vertrauen

vertrawen auff den Son Gottes sein wie ge-
sagt ist / vnd muss die andern tugende altzeit
vberschatten / denn alle tugende sind schwach
in vns / vnd bleibt noch viel vnreynigkeit in
Menschlichem hertzen in diesem leben.

Darumb müssen wir vns an den mitler heil-
gen / vnd durch ihn gnad suchen / Denn also
spricht der Psalm. Für dir ist kein lebendiger
Gerecht / vnd Daniel. 9. spricht / Erhör vns
nicht von wegen vnser gerechtigkeit / Sondern
von wegen deiner barmhertzigkeit vmb des
Herrn willen etc.

Also sollen wir auch für Gott treten / vnd
dieses vertrawen auff den Sohn Gottes mit
vns bringen / vñ wissen / das ob gleich lieb vnd
andere tugende in vns sindt / vnd sein müssen /
das sie dennoch zu schwach sindt / vnd das ver-
trawen auff den Sohn Gottes stehen sol.

Vnd so man von eingegebener gerechtigkeit
/ (wie sie es nennen) redet / sol man diesen
glauben vnd lebendigk vertrawen nicht auß-
schliessen / denn es ist der hohen vnd nöttigen
tugenden eipe / Ja dieses vertrawen erwecket
trost / lieb / anruffung / vnd leben im hertzen /
wie geschrieben steht ad Gall. 2. Das ich nuh
lebe / lebe ich durch den glauben an den Sohn
Gottes.

Vnd kan lieb vnd trost im hertzen nicht
sein

sein oder bleyben / wo nicht dießer glaub / vnd
dießes vertrauen vorgehet.

Vnd ist vnbedechtig im Buch geredt / das
man Erst warhafftiglich gerecht werde durch
die lieb / So doch dieße gerechtigkeit / das vns
Gott gnedigk ist / vmb des mitlers willen / vnd
das der mitler vnser schwachheit decket / viel hö
her zu achten ist / Denn vnser eigene lieb.

Vnd so wir in der nott findt / vnd die anz
ruffung ein rechter ernst ist / So suchen wir
nicht vnser liebvnd eygene reynigkeit / Son
dern erschrecken viel mehr vor vnserm grossen
elendt vnd sünden / vnd müssen trost suchen /
bey dem eynigen Personer / den vns Gott aus
grosser barmhertzigkeit vnd wunderbarlich
er weisheit furgestellt hat / Davon spricht
Paulus *Iustificati fide, pacem habemus*, So wir
durch glauben gerecht sindt / haben wir fried.

Vnd das dieße lehr gewisslich die vnwan
delbare stimme / vnd meynung des Euangelij
sey / In der Kirchen Gottes von Adams zeiten
her / das ist klar durch die gantze schrift / vnd
stellet vns S. Paulus Abraham fur augen /
vñ erkleret den spruch / Abraham gleubet Gott /
vnd dießes ist im gerechnet zur gerechtigkeit /
Das ist / Ob wol Abraham grosse tugende
hat / So ist er doch also fur Gott gerecht vnd
Gott gefellig / das er gleubet / Gott wölle ihm
gnedig sein / laut seiner verheißung.

¶ Vnd

Vnd wiewol dieser verstandt offtz zu allen
zeytten vert unckelt ist / So ist er dennoch bey
den verstendigen Christen blieben / vnd bleibet
allzeit / wie eynes yeden Gottfürchtigen ver-
stendigen Menschen / eygne erfahrung anzey-
get.

Darumb ist ein mangel im Buch das es
setzet / die lieb sey die warhafftige gerechtige-
keit / vnd tichtet / Glaub sey nur ein wissen /
wie es in Teuffeln ist.

Vnd sagt weiter / der Mensch sey ein Er-
be des ewigen lebens / Darumb das er die lieb
hat / weyset also auff eygene tugenden / vnd ge-
schweiget dieses trosts / das wir glauben sol-
len / das Gott gewisslich alle / die sich bekeren /
vnd auff den Son Gottes vertrauen / Durch
solchen glauben zum ewigen leben annimpt.

Das aber etliche sagen / wir verstehen das
Buch nicht / das lassen wir die richten / die er-
nach dauon weiter schreyben werden / so es
an das liecht kompt.

Vnd so mans gleich subtil entschuldiget /
vnd die stücklin hin vnd her zusamen lisset / So
ist es im doch selb wiederwerdig.

Dieweil dann diesser Artikel / wie der
Mensch für Gott gerecht / vnd Gott gefellig
sey / allen Menschen recht bekant sein sol / da-
mit

mit dem Son Gottes seine Ehre gegeben wer-
de/vnd die Menschen rechten trost haben/sol-
len alle Menschen gelert vnd vngelert helffen
die Göttliche lehr des Euangelij / rein vnd vn-
uertunckelt erhalten.

Derhalben können wir nicht rathen / das
yemandt das Buch in diesem stücke anneme.

Vnd dieweil öffentlich ist/das keiner Crea-
tur im Himmel vnd auff Erden gebürt / den
wunderbarlichen radt Gottes / im Euangelio
offenbaret / zu endern / So wollen wir durch
Gottes Gnaden / Auch fort hin die lehr vom
glauben vnd gutten wercken trewlich lehren/
wie wir sie nuhn viel Jar in diessen Kirchen ge-
prediget vnd erkleret haben/denn also ist sie in
Göttlicher schrift klar außgedruckt.

Von der Kirchen vnd

Bischoffen.

In dem Elfften blat bis auff das achtzehende
wirdt geredt was die Kirche Gottes
sey / vnd von ordnung vnd gewaldt der
Bischoffen / vnd sindt etliche stück eingeflickt/
welche von Gottfurchtigen / gelertten leutten
billich angefochten werden.

Dieweil aber diese redē / fast bis zu ende die-
ses Artickels gemeine / weitlenfftige / zweiffelha-
fftige / hefftige reden sind / So wollen wir nicht
B ij rathen /

rathen/ das vnser Gnedigster Herr dieffen Ar-
tikel streitte/ Es ist war/ das die Kirche die ver-
samlung ist/ der recht gneubigen/ vnd das man
sich von der Kirchen nicht absundern solle/ Da-
von ist aber die frage / welche die rechtgneubi-
gen sint.

Vnd dieweil vns zu schmach die absunder-
rung hoch beschwert wirdt / So ist dennoch
vnser notturfft diese antwort dagegē zuthun/
Welche das Buch selbst bekent / Es ist Gottes
vnwandelbar gebot/ das die lehrer falsche lehr
vnd falsche Gottes dienst straffen müssen/ So
nuhn der gegen teyl der warheit nicht weichen
wolte / Vnd folgen daraus spaltungen / So
sindt die verfolger der warheit vnd sonderlich/
in nöttigen wichtigen sachen vor Gott streff-
lich/ vnd nicht die armen Gottfürchtigen leut-
te / die die warheit Predigen oder annemen/
Dieses ist öffentlich / vnd ist der spruch Pauli/
Davon menicklich bekant / So ein Engel vom
Himmel ein ander Euangelium Predigte / so
sol er verbant sein / Das aber viel grössere yrr-
thum vnnnd mysbreuche noch zu dieffer zeyt/
vom Babst vnd den seynen vertheydinget wer-
den/ das ist öffentlich/ vnd hat das Buch selbst
ettliche yrrthum gestrafft / die doch die Conci-
lia zu Trident / vnd zu Bononia gesterckt ha-
ben/ Das sey zuentschuldigung vnserer Kirchen
auff dis mal genugt.

Wir bitten auch vnsern Gnedigsten Herr
ren

ren vnd eine löbliche Landtschafft / So die Bischoffe den gehorsam haben wollen / Das auff solche wege gedacht werde / Das sie die warheit nicht verfolgen / vnd nicht abgöttische Ceremonien im Landt widerumb auffrichten.

Weitter ist vnser notturfft / auch die sses anzuzeigen / Wiewol wir nymandt beladen wollen / das er sich dießer disputation / die in diesen Artickeln stecken / anneme / Denn sie findt nicht alle gleichnöttig / vnd findt etliche sachen / Darzu man der alten Kirchen beständige gezeugnus bedarff / Welche zusuchen nicht yedermans arbeit ist / So wollen wir doch vns selbst / vnd andern diesses vorbehalten / Das ein yeder auff seine eygene ferlichkeit von diesen vnd andern sachen / Christlichen vnd nützlich en bericht vnd sein eygne bekentniss thun sol / Denn das Buch saget in diesem stück von den Concilijs vnd de Potestate interpretationis, von gewalt die schrift auszulegen / da ist noch viel von zureden / Gott hat Gnediglich offentbarung geben / von seinem wesen vnd willen / die sollen wir hör en vnd annemen / vnd nicht wie in weltlichen Königreichen / einer gewissen person gewaldt geben / deutunge zu machen ires gefallens.

Von Sacramenten.

D In der Tauff ist kein streit / vnd haben vnser Kirchen von der Kinder Tauff / vñ
W iß andern

andern anhangenden Artickeln / Christlich vnd
nützlich gestritten / vnd gatten festen grundt /
wider mancherley yrtumb der Widerteuffer
angezeygt / vnd hat diese vnser arbeit / zuerkle-
rung vieler Artickel nützlich gedienet.

Von der Confirmation vnd Dlung.

D In der Confirmation vñ Dlung / Katen
wir auch nicht zustreiten / one soniel
die anruffung der Heyligen belanget /
Danon wir hernach sagen wollen / vnd wiewol
wir einen missgefallen daran haben / das man
diese beyde werck / Confirmatio vnd Dlung al-
so rümet / das man sie den andern Sacramen-
ten vergleicht / vnd binden des heyligen Geis-
tes wirckung daran / vñnd doch öffentlich ist /
das sie nur zu eynem schein also geschmucke
werden / so wollen wir doch ytzundt nicht da-
von disputirn / vnd befelhen solches auch / ey-
nes yeden eigenen bekenntnis.

Wir können aber nicht willigen in die grof-
se Gottes lesterung / das man vnsern Priestern
solt aufflegen anzunemen ader auszuteylen
solche Vnctiones vñnd Abgöttische Consecratio-
nes, Dauon felschlich gerümet wirt in den Pon-
tificialibus vñnd Agenden, Das dadurch den Leut-
ten / der Heylige Geist / vergebung der sünden /
vñnd ander Gottes gnad vñnd schutz wider den
Teuffel gegeben werde / vñnd zur seligkeit leibs
vñnd der seelen dienen sollen,

Von

Von der Busse.

In der Busse wissen alle verstendige das vor dieser zeit / die Mönch lere in diesem Artickel fürnemlich vol grosser yrthumb vnd blindtheit gewesen / haben keinen bestendigen trost können anzeygen / haben viel mehr dagegen gelert / Man solte alzeit in zweifel bleiben / von vergebung der sünde / Item haben die gewissen mit vnmöglicher erzehlung der sünden / vnd hernach mit viel yrthumen der gnugkthuung beladen / vnd Indulgentias warffarten vnd viel aber glaubens angericht.

Die selbigen jrthumb vnd misbreuche haben erstlich diesen streit von der leere erreget / Denn Göttfürchtige / verstendige Prediger haben müssen solche grobe yrthumb vnd Gottes lesterung straffen.

Vnd ist also die leere von der buss durch Gottes Gnaden gründtlich erkleret worden / Das alle verstendige bekennen / das die selbige Christliche erklerung / in vnsern Kirchen recht vnd tröstlich sey / vnd zu rechter anruffung Gottes / vnd zu erkentnis des Euangelij / nützlich sey.

Von der Beichte.

Auch ist die Beicht in vnsern Kirchen vleisigk erhalten mit guttem vnterricht

DAS

Das man die Absolution da suchen sol/denn wir
aus grosswichtigen vrsachen die Priuat absolu-
tion zuerhalten nötigk achten / Dieweil sie
auch ein zeugnis ist/ Das in der kirchen/verges-
bung der sünden ist / vñ das die gefallene nach
der Tauffe widerumb mögen angenommen wer-
den / Es ist auch recht das ein gemein bekent-
nis vñnd demut sey / Das die yeningen / so die
Absolution begeren / Ein anzeygung geben/
Das sie sich sündler vñd schuldig vor Gott be-
kennen.

Aber daneben wollen wir / die gewissen
nicht mit diesser geferlichen vñd vñnotigen last
beladen / Das sie meynen sollen / die sünde erze-
lung in specie sey nötigk.

Vñd dieweil diesser Artickel aller menschen
gewissen betrifft / Ratten wir auch nicht / Das
andere diesses stück willigen.

Von der Satisfaction.

IN der Satisfaction ist viel gelinder im
Buch geredt / Dann vor zeitten in der
München lehr / Es sindt aber weitleuff-
tige reden / die noch viel erklerung bedörffen /
Darumb wir diessen Artickel auch eynes yez-
dern eygenen erklerung vñnd bekentnis be-
fehlen.

128
Rom

Vom Sacrament des Leybs vnd Bluts Christi.

Sind vnser Kirchen nicht wider das Buch/So aber von yemandt weiter erklerung von diessem Artickel gefodert wirdt/den lassen wir in eygener bekentnus darvon reden.

Von der Priester Weyhung.

Lassen wir vns nicht missfallen / Das sie in der Sacrament zal gerechent werde / so sie recht vñ Christlich gehalten wirdt / Vnd wünschen das sie in allen Landen mit grossen vleis gehalten würde / das es nicht allein ein Ceremonia vnd Spectakel were / Sondern das die ordinanden wol verhört vnd vnterwiesen würden / Vnd das bey der Ceremonia ernstliche gebet geschehen. Item das auch hernach ein vleisigk auffsehen auff die lehr vnd sitten der Priester geschehe.

Von der Ehe.

Ist diesser Artickel nötigk / das in der Ehescheidung der vnschuldigen person die ander Ehe zugelassen werde / Darumb das selbige stück im Buch von diesser mas der Ehescheydung / das sie nicht ferner / denn zu Pet vnd Fische geschehen müge / nicht zuwilligen.

E Von

Von der Messe.

Das Buch bekennet/das die Mess nicht
vergebung der sünden verdiene / Das
ist war / das sie aber hernach weiter
sprüch auß den alten vnd newen le-
ren vom Opffer einführen/ire Priuat Messen da-
mit zustercken / das sint weytleufftige reden/
vnd were dagegen sehr leicht guten grund
auß Augustino vnd andern anzuzeygen / Das
die selbige sprüch/ire Priuat Messen vnd Opffer
nichts angehen/Denn ob sie es gleich ein Opf-
fer nennen/so erkleren sie sich doch selbst also/
das es nicht vergabung der sünden verdiene/
Item auch nicht also / das sie selbst den Son/
Gott dem Vatter Opffern/den dieses ist ein ei-
gen werck des eynigen Sons/ das er sich selbst
Opffert/wie der text spricht/Heb.9. Dieser ist
durch sein eigen blut in das heyligthumb ge-
treten / Er stehet für dem Vater als der versö-
ner für vnd für/vnd bit für vns / In dem selbis-
gen aller heimlichstem radt / das ist das heyl-
ligthumb.

Aber vom menschlichem Opffer reden sie
also/das es sey eine dancksagung vnd gedech-
nis/das ist/da man mit glauben die erworbe-
ne vergabung vmb des Sons willen bittet vnd
annimpt / vnd diese gebet vnd dancksagung
sollen geschehen in der austeylung vnd nies-
sung / wie es befohlen vnd eingesetzt ist / vnd
ist die Ceremonia an sich selbst ane diese werck
im

im hertzen / glauben / gebet / vnd dancksagung
kein Opffer / Das sey gnug von der alten lerer
reden / Da von wir zu yeder zeit mehr bericht zu
thun vns erbielten / vnd nach dem / gantzer
Christenheit / viel an dieser sachen gelegen ist /
vnd die Messe durch viel yrthumb in grosse
missbreuche gezogen / Darumb one zweyffel
Gott die Welt straffet / wie geschriben stehet /
Wer vnwirdig geneusst / der macht sich schul-
dig am leib vnd blut Christi / solt man die war-
heit Gott zu lob vñ dem menschen zur seligkeit
hirinne mit grossem ernst / suchen vñ helfen er-
halten / vnd ist dieses auch der Artickel einer /
der in gemein alle Menschen gelart vnd vnge-
lart betrifft / Darumb kurtzlich ytzundt auff
diese frag zuantworten / ob die Priuat Messen
das ist / Messen one Communicanten widerumb
auffzurichten sindt / ist diese vnser antwort /
das wir trewlich rathen / das man nicht wider-
umb Messen one Communicanten auffrichten
wolle / vnd ist die vrsache klar / man solle in der
Kirchen / keinen Gottes dienst ordenen vnd
machen / der nicht in Gottes wort geordnet
vnd befohlen ist / Nuhn der brauch des Sacra-
ments ist also geordnet / vnd nicht anders das
die aufsteylung vnd nyessung geschehe wie der
Son Gottes spricht / Nemet hin vnd esset etc.
Dieses thut zu meynem gedechtnis / Vnd ist
also viel hundert Jar / in der ersten Kirchen ge-
halten worden / Darumb ist dieser erste brauch
den Worten Christi gemess gewisslich recht vñ
sol erhalten werdē vñ sollen nicht andere werck

E ij darinn

darinn die nicht befohlen sindt / auffgericht
werden.

Vnd sindt vorzeiten nicht an allen örten
teglliche Messen gewesen / Sondern zu Alexan-
dria als in einer grossen Stadt ist die Communio
die wochen drey mal am Sontag / Mittwoch/
vnd Freytag / gehalten worden / inn vielen an-
dern Stedten / allein auff den Sontag vnd
Feyertag.

Diese alte schöne gewonheit / wirt in vn-
sern Kirchen / durch Gottes gnaden mit aller
reuerentia / mit der Predigt / lection, gebet / vnd
dancksagung gehalten ordentlich.

Vnd so man nuh ein ander werck auffri-
chten würde / Würde das ergernis viel hertz-
en verwunden / vnd gantz von der Communio
abschrecken.

So sindt auch mehr beschwerungen an
diesem Artickel / von der Messe angehenget/
Nemlich vom Canon / Heyligen anruffung/
vnd seel messen.

Nuhn spricht der Canon öffentlich / das
man dieses werck halte zur erlösung der see-
len etc. Daraus alle vngelerten diesen verstandt
genommen / das dieses werck vergebung der sün-
den verdiene / welche meynung auch dem Buch
zu wider ist.

So

So sindt auch andere vnformliche Rede
im Canon / als das der Priester bittet / Gott
wolle ihm dieses Opffer gefallen lassen / wie
Abels Opffer / so sie doch das Opffer vom son
Gottes verstehen.

Vnd in Summa / es sindt so viel graussam
me missbreuch / In der Bepstlichen gewon
heit das wir erschrecken / so wir dauon reden /
Witten auch / man wolle nymandt nicht belast
den / mit solcher wider auffrichtunge.

Von der Heyligen anruffung.

DIE anruffung eines vn sichtbarn wes
sens / das nicht bey vns ist / gibt dem sel
bigen wesen die ehr / das es aller mens
schen hertzen vnd seuffzen erkenne vnd rich
ten könne.

Diese ehr gebüret allein Göttlichem wes
sen / darumb ist die heyiligen anruffung vn
recht.

Vnd das man gleich dagegen erticht hat /
Gott thue yhnen besondere offenbarung von
solcher anruffung / das redet man one grundt /
vnd setzen dagegen wir diesen hohen spruch /
Du solt Gott deinen Herrn anbetten.

Das man auch saget / man ruffe sie als die
ner vnd furbitter an / diese antwort ist auch

E iij nicht

nicht genugsam / denn die anruffung an jr selbst
ist zeugnis / das man den vn sichtbarn für all
mechtig heldt.

Zum andern so sollen wir neben dem hey
landt dem Son Gottes / nicht andere mitler
stellen.

Zum dritten so ist öffentlich der gantzen
Welt / das man die Heyligen nicht allein / zu
mitlern gemacht / Sondern man ist viel weiter
gangen / Man hat besondere hülff bey yedem
gesucht.

Diese grosse Abgötterey wirdt gesterckt / so
man den anfang vnd diese anruffung behelt
dauon das Buch saget.

Zum vierden / Man sol keinen cultum in die
Kirchen einfüren / den Gott nicht geordenet
hat / durch sein wort / der Heyligen dienst hat
keinen Göttlichen befeel / wie öffentlich ist.

Zum fünfften / das menschlich hertz sol vnd
kan nicht anruffen / wenn es nicht weis ob
Gott solche form der anruffung gefellig ist /
Nahn ist kein Gottes wort / das vns also lere
anruffen / vnd sindt dagegen / die verbot starck /
welche leren das man allein / Göttlich wes
sen / vnd durch den mitler anruffen sol / vnd sol
dieser spruch fest bleiben / was jr den Vatter
bitten werdet in meynem namen das wirt er
euch

euch geben/dieser einiger Son ist vns für ge/
stelt als mitler/versöner/vñ fürbitter/ Dagegē
saget das Buch / nicht allein von fürbit/son/
dern auch von verdienst der Heyligen / das
noch strefflicher ist/vnd ist eine vnuerschembte
lügē / das es saget/Jacob habe seine Kinder ge/
leret/Abraham/ Ysaac vnd in anzuruffen/vnd
deuttet den spruch Gene. 78. Sie sollen meine
vnd Ysaac vnd Abrahams Kinder genennet
werden/das ist ich bezeuge das die verheissung
die Abraham/Ysaac vnd mir zugesagt sindt/
die sollen auff sie / als auff vnseren nachkomen
erben/ nemlich das sie gewislich ein kirch vñ
regiment haben werden / vnd werden darinn
viel erben sein der ewigen seligkeit.

Diesen warhafftigen verstandt / lest das
Buch fallen / vnd tichtet einen falschen / von
der anruffung etc.

Der gleichen sindt andere mehr spruch in
Buch vnrecht gedeutet / Aufs diesem allen ist
klar/das nymandt in diesen Artickel des buchs
willichen sol / in welchen die Heyligen anruf/
fung/gebotten vnd gesterckt wirt.

Aber der gantzen kirchen Historien/von an/
fangt bis zu ende zu wissen/ist zu vielen sach/
en nützlich / das man zeugnis daraus neme/
das Gott seine kirch für vnd für erheldt /vnd
das man Gott dancksage / das er sich in den
heyiligen geoffenbart hat.

Item

Item das wir vns mit der heyligen Exem-
pel vnterweissen vnd stercken.

Darzu werden der heyligen ware Historien
bey vns in den Predigten / oft angezogen / vnd
den Leuten vorgetragen / welchs wir forthin
auch thun wollen.

Von den Seelmessen.

Die selben Messen sindt in Clöstern vnd
andern Kirchen schier in allen Landen /
die gemeinsten Ceremonien, Denn sie tra-
gen gelt / vnd sind viel yrthumb zugleich mit
den Seelmessen in die Welt eingerissen / Da-
von yetzundt zu lang zureden ist.

Es ist aber auch ein verkerung des Sacra-
ments / das mans für die Todten applicirt /
Denn das Sacrament ist eingesatzt / der leben-
digen glauben damit zuerwecken vnd zu ster-
cken / Item zur gedechtnis etc.

Nuhn sindt die Todten nicht darbey / vnd
wirt on allen grund geredt / das der Priester
innen durch diese Ceremonien etwas verdiene /
Darumb ist dieser Artickel im Buch / auch in
keinem wege zuwilligen vnd der angezogene
spruch / aus Dionisio von der begrebnis / redet
gantz nicht von der Messe / vnd das etliche für
die Totten gebeten haben / gehet die Messe
nichts an / das sey dauon auch genug auff dis-
mal.

Von

Von den Ceremonien.

In vnsern Kirchen sindt die furnemen Ceremonien, die zu gutter ordnung dienen/ Als Sontag/feste/mit gewonlichen Iecti- on, vnd gesangt / nicht viel geendert / wollen auch noch die selbigen mit vleis erhalten vnd wo man in solchen mitlen dingen etwas be- dencken wirt / mit gutem Radt der jenigen die die Kirchen Regieren sollen das zu mehrer gleichheit/vnd guter zucht dienlich/ wollen wir gern helffen einigkeit vnd gutte zucht erhal- ten/denn wir wollen von den selben mittel din- gen nichts zancken / souil den Christlichen brauch belanget.

Also auch irret vns nicht/man esse fleisch od- der fische/Gleichwol mus man die lehr von vns- terscheidt/rechtem Gottes dienst/vnd solchen mitlen vnnötigen dingen nicht verleschen las- sen/wie sie vor diesser zeit / schier gantz verlo- schen gewesen / wie Augustinus zu seiner zeit/ vnd vor hundert Jaren Gerson vnd noch vor funffzig jaren/Wessalus zu Basel / Wesalia zu Meintz/ vnd ettliche andere sehr geklaget ha- ben / denn ob gleich yrthum im grössern hauf- fen/in der Kirchen für vnd für sindt. So bley- bet doch in ettlichen rechte Gottes erkentnis/ vnd rechte anruffung / vnd besser verstandt der Göttlichen lehr/denn im grossen hauffen/ vnd ist Gottes wille / das man yederman von rechten Gottes diensten trewlich vnterweyffe.

D Was

Was aber betrifft die gesenge/von den hey-
ligen/ da ist vor von gesagt/ das die anruffung
nicht anzunemen ist.

Item dieweil wir in vnsern Kirchendas
Sacrament nicht teylen / So findt auch die
Proceßion, darinn ein teyl getragen wirt zu vn-
terlassen.

Darzu ist gewisslich war /das Sacrament
in irem brauch / wie sie durch Gottes wort ge-
ordnet sindt / warhafftige Sacrament sindt/
Nicht wenn sie zu andern frembden wercken/
auffer irer einsetzung gewendet werden / Dar-
umb ist das spectacal in der Proceßion, vnrecht /
vnd sol nicht gesterckt oder wider auffgericht
werden.

Über das alles / so ist dieses auch bey den
widersachern bekant/das Priuat Messen/heyli-
gen anruffung / Seelmessen vnd die Proceßion,
vnd ettliche mehr solche gewonheiten / wenn
sie gleich zuentschuldigen weren / dennoch vn-
nötigk vnd ferlich sindt / vñ das das Exempel
der wider auffrichtung / die grossen yrthumb
vnd misbreuche bey den andern stercket / vnd
in diesen Kirchen widerumb einfüret / Item
das die ergernis / viel Gottfürchtige leutte be-
trüben wirdt / Item das viel verfolgung ver-
sucht / vnd viel Priester vnd andere personen
veriaget / gefangen /vnd vielleicht getödtet
werden.

Nuhn

Nuhn sindt durch Gottes gnaden / diese
landt yetzundt / mit vielen Gottes gaben gezie-
ret / mehr dann ander landt / mit kirchen / mit
zimlicher zucht / gericht vn̄ recht / mit narung /
mit löblichen künsten / das wir nuhn solchen
zimlichen standt / selbst verstören solten / vnd
dazu wider Gottes gebott / das können wir
nicht rathen / Vnd weyl geschrieben steht /
was aus Gott ist das bleibet / so wirdt man im
werck befinden das ob gleich verenderung
der kirchen an ettlichen örthen angefangen
würde / das dennoch diese lehr / die wir Predi-
gen in andern landen vnd kirchen bleiben
wirdt / vnd wirdt also das Interim wenigk ey-
nigkeit machen.

Das man aber kriegk fürchtet / darauff ist
vnsere vnterthenige anzeygung / die herschafft
wirdt sich hierinnen wol wissen zuerinnern /
was sie gegē den kirchen schützhalben thun sol-
len / oder können / für vnsere person / sindt wir
durch Gottes gnaden zu weichen vnd sunst zu
leyden bereit.

Das wir aber nicht gelinder radten denn
wie gesaget ist / ist nicht freuel oder stoltz / Son-
dern Gottes gebot zwinget vns / das wir er-
kante warheit nicht verleugnen vnd nicht ver-
folgen sollen / So hoffen wir diese schrift /
werde selbst anzeygen / das wir nicht von digni-
teten oder gütern streitten / Sondern allein
von nöttiger lehr / vnd Gottes dienstensagen.

D ij So

So wöllen wir auch die herrschafft vnnnd
andere leute nicht beladen / mit sonderlicher
disputation / die nicht allein zu wissen möglich
ist / Sondern wöllen dauon vns vnd andern/
derer ampt vnd Vocatio ist / andere zu lehren/
dieses fürbehalten haben / das ein yeder inn ei/
gener bekenntnis / auff eygene ferrlichkeit da/
von antworte.

Doch ist auch nicht vnser gemüt / etwas ne/
wes / oder anders zulehren / den alleine diese ei/
nige warhafftige lehr / die durch Gottes gnade
in den Kirchen dieser lande / von den verstend/
gen vnd Gottfürchtigen eintrechtlich gepre/
digt wirdt / vnd in beyder Vniuersiteten Leypsigk
vnd Wittenbergk schrifftten bekant ist / welche
lehr wir wissen / das sie der ewigen Catholiken
Kirchen Gottes von anfang an / biss auff diese
zeit / lehr vnd verstandt ist / vnd ist dieses vnser
bedencken / darhin gericht / das diese Kirchen
nicht vnruhig werden / vnd in Gottes anruf/
fung vnnnd rechten Gottes diensten bleiben /
denn so die gewissen mit ergernis verwundet
werden / So wirt die anruffung sehr geschwe/
chet / vnnnd folgen viel sünde / verachtung vnnnd
zorn wider alle Religion / für welchen sünden
vns Gott gnediglich bewaren wolle.

Vnd nach dem vns newlich zugeschrie/
ben ist / Das in der Vorrede vor dem Buch
ernstlich verbotten sey / wider dieses Interim zu
predigen zu leren / oder zuschreiben / So ist die
notturfft

notturfft in demut dieses anzuzeygen / das wir
die rechte lehr in vnsern Kirchen / wie wir bis
anher geprediget nicht endern wollen / denn
kein Creatur / Göttliche warheit zu endern
macht hat / Auch sol niemandt erkante war
heit verleugnen / Dieweil das Interim in vielen
Artickeln / die wir angezeiget haben / der rech
ten lehr zuwider ist / So müssen wir dauon
warhafftige bericht vnd warnung thun / wel
che wir mit Christlicher mass thun wollen /
vnd wollen dem Almechtigen ewigen Gott
Vatter vnser Herrn Jesu Christi / vnser fehr
lichkeit befehlen / vnd dieweil Gott auß vn
aussprechlicher gütigkeit / ihm eine ewige Kir
che samlet / vnd seinen wunderbarlichen radt
dauon selbst vber aller Creaturn weisheit /
vnd gedancken geoffenbaret hat / Bitten
wir / Er wolle auch die selbige seine lehr /
allezeit selbst erhalten / vnd auch in die
sen landē ihm ein ewige Kirchen für
vnd für samlen / vnd darzu selige
Regiment verleyhen / Amen.

Finis Junij 16.



10
11
12
13
14
15
16
17
18
19
20
21
22
23
24
25
26
27
28
29
30
31
32
33
34
35
36
37
38
39
40
41
42
43
44
45
46
47
48
49
50
51
52
53
54
55
56
57
58
59
60
61
62
63
64
65
66
67
68
69
70
71
72
73
74
75
76
77
78
79
80
81
82
83
84
85
86
87
88
89
90
91
92
93
94
95
96
97
98
99
100



QK 9/4346

(X2206652)

M

11







Inches
Centimetres

Farbkarte #13

B.I.G.

Blue

Cyan

Green

Yellow

Red

Magenta

White

3/Color

Black

n auff's
RIM
digen vnd
n Herrn
ANTHONIS.

8.
BIBLIOTHECA
AVIANA

BIBLIOTHEK
LE
E

Vg
4346

